

www.BibleForChildren.org

Matius 26



Ono-eopa
pade Eo Mbaso
Paskah, i Yesus
hau ri ngata Betania,
ngata niponturo i
Lazarus nipakatuvaNa
mpanjili lako ri kamatena bara
ipia. Tempo ira nonturo hamai, i
Maria nangala sabotolo lana
vangi narwastu anu nasuli
mpuu alina, nitasere santanga
lite isina. Bo nakavamo ia mombatoli
lana haitu ri kada i Yesus tanda
pebilana, bo nipakabaina ante buluana. Bo riara banua
haitu navangi mpuu soana lako ri lana vangihaitu.



Naupu sia, i Yudas, saito lako ri sapulu randua anaguru i Yesus, hau nte balengga-balengga ntopanggeni pesomba. Patujuna mompobalu i Yesus ka ira. Tempo niepera tesa i Yudas haitu, nadamba mpuumo rarara bo nojanji mombadekei doi ka ia. Naupu haitu nompamulamo i Yudas mangelo loga nabelo mombadekei i Yesus ka baliNa.




Bo haumo ana-anaguruNa novia
anu nitudu i Yesus ka ira, bo
nipakasadiaramo kandeia Posusa
Paskah. Tempo ira da nangande, i
Yesus nangala roti bo nosambaya
nanguli tarima kasi ka Alatala.
Naupu haitu nitubiNa roti haitu bo
nibagiNa ka ana-anaguruNa bo
nanguli, “Alamo roti hitu, bo
kandemo. Hitumo
karoKu.”




Naupu haitu nialaNa muni saboda
uve anggur. NiuliNa tarima kasi ka
Alatala pade nidekeiNa ka ira bo
nanguli, “Panginu puramo komiu
sabana hitumo raaKu rapatiti ka
todea ngena ala mompakaasa
Pojanji nu Alatala nabaru. RaaKu
hitu rapatiti ka todea ala
dosa-dosara raampungi.”



Pade nanguli i Yesus ka i Simon Petrus, “Simon, epemo tesaKu! Magau nu Seta nipaloga nu Alatalamo mompesori komiu pura-pura nasimbayu mpo topovaro pae. Tapi niposambayaKukamo iko, Simon, ala pomparasayamu ledo moura. Jadi maupu iko rapesori bo muoseaka mpanjili Yaku, iko kana mompakaroso pomparasaya nu roamu.”



Pade nesana i Petrus, “Pue, ledo kupalaisi Komiu! Yaku nasadia ratarunggu mosanggani-nggani nte Komiu!” Tapi nesana i Yesus, “Pariaramo, Petrus! Dopame mototoroko manu ngena bobaya, talu-ngganimo iko mombasapu Yaku!”



Naupu sia i Yesus ante
ana-anaguruNa hau ri
sangu pampa niuli
Getsemani. Nanguli Ia,
“Ponturomo ri sii.
Haunapa Yaku
mosambaya.” NiuliNa,
<<Tata! Ledo ria anu ledo
rapakuleMiu movia. Ane
mamala, peparajea anu
rapambela ka Yaku hitu nee
rapambela ka Yaku! Tapi nee
dotaKu majadi, damo aga
dotaMiu majadi.>>



Jadi i Yudas nangingeni salunu tantara nu Magau Mbaso Roma bo topojaga Banua nu Alatala hau ri pampa haitu. Ira nitudu nu balengga-balengga ntopanggeni pesomba bo toFarisi. Nikenira poindo, sulo bo pareva posieva. Saito ira netimbe mpuumo bo nambela batua nu Pakeni nTopanggeni Pesomba bo napudu talinga ngganana. Tapi i Yesus nombatagi ira, “Nee metimbe!” Bo nituiNa talinga ntona bo nipakabeloNa.



Nisakara mpuumo i Yesus bo nikenira hau ri banua nu Pakeni nTopanggeni Pesomba. I Petrus netuntuni nggavao lako ri purina. Ri doyata naria apu nipadumpu ntona rapanderu. Jadi haumo i Petrus nonturo nte topanderu haitu.



Naria munimo saito batua
nu Pakeni nTopanggeni
Pesomba ri sia. Ia
nambela raposampesuvu
ntona napudu talingana
nisoesi i Petrus. Ia muni
nekutana, “Ledo iko nikitaku
ri pampa nosangani-nggani
ante i Yesus pangane?”
Tapi nesapu vaimo i Petrus,
“Ledo!” Nesanapa i Petrus, kaliu-liu
nototorokomo manu. Pade nesuvumo
i Petrus hau ri savalikuna bo
notumangi natesumonde-monde.



Jadi neangga puramo toPolibu Mbaso haitu hau manggeni i Yesus ri ngayo Gubernur Pilatus. Nekutanamo Gubernur Pilatus, “Nakana mpuu Iko Magau ntoYahudi?” Nesana i Yesus, “Nakana niulimiu.” I Pilatus madota mombakabasaka i Yesus, jadi niulina vai sangganipa ri ngayo ntodea.





Tapi nongare vaimo ira, “Pakumo

Ia ri kayu salib! Pakumo Ia ri kayu salib!”



Kaupuna nidagi i Pilatus, bo nidekeina i Yesus ka ira ala la rapatesi ri kayu salib. Nialaramo i Yesus bo niken i ntantara-tantara hau ri savalikuna. Nesuvumo la lako ri ngata haitu bo nisimbuakaNa mboto kayu salibNa hau ri ponturo niuli “Bulu Banga Balengga.” Riara basa Ibrani sangana “Golgota.”






Ri siamo i Yesus nipakura ri kayu salib. Ri tempo haitu naria muni randua tona ntanina nipaku ri kayu salibra, saito ri sabingga ngganaNa, saito ri sabingga njidiNa bo i Yesus ri tatangara.



Pade kae povombo ri Banua nu Alatala nabite najadi
rombite. Naupu haitu i Yesus nongare ante suara
namangga, “Tata, siimo nyawaKu!” Naupu nanguli
ivesia, naponjimo nosaNa.



Uru nggovia haitu, nakavamo saito
toArimatea nosanga i Yusuf.
Ia saito lako ri Polibu Mbaso
Agama Yahudi bo nibila
ntodea. Ia muni
nantongoraka
tempona Alatala
moparenta mpo
Magau.

Ia nompebia hau
mantingayo i Pilatus
merapi karobata i
Yesus.



Jadi niali i Yusufmo kae gandisi
nalusu raposompu, bo nitaurakana
karobata i Yesus lako ri kayu
salib pade nisompuna ante
kae nialina haitu. Bo
nidikana karobata i
Yesus haitu ri bolo
vatu anu nipaa
rapodayo.

Naupu haitu
nidulikanamo sangu
vatu mbaso
rapombatutui vamba
dayo haitu.



Naeo mpadondona ri eo penonto,
balengga-balengga ntopanggeni
pesomba bo toFarisi hau
nosinggava nte Gubernur
Pilatus. Nakava hamai,
nanguli ira, “Pua,
nitora kami tesa
ntopebagiu haitu
tempo la da
natuvu.”




“NiuliNa, ‘Maliu talu-mbongi Yaku matuvu mpanjili.’ Jadi hau ira nombamere vatu poupi dayo ala ledo rabuka ntona. Bo nitudura tantara-tantara mombajagai dayo ala ledo maria tona mombabuka dayo haitu.”



Naliu eo penonto, dopame nebonda eo,
ri eo Aka hau i Maria Magdalena
bo i Maria ntanina manggita
dayo i Yesus. Sampesani
naria lingu mbaso sabana
malaeka nTupu nanau
lako ri suruga
nombaduliaka vatu
poupi dayo.


Naupu haitu
nonturomo ia ri
bavona.



Tantara-tantara anu nojaga ri sia
naeka mpuu sampe nolete-lete
njumanggaro. Nadunggamo
ira najadi eva tomate.




Bo nanguli malaeka haitu ka
mombine-mombine, “Nee maeka.
Nisaniku komiu nangelo i
Yesus anu namate nipaku ri
kayu salib. Ia domo ria ri
sii. Natuvu mpanjilimo
la nangoseaka anu
niuliNa bara ipia.



Kamaimo peinta
ponturo nipomboli
karobataNa.”

Jadi nalaimo ira nasalisa lako ri dayo. Naeka ira tapi nadamba muni rarara. Nangovamo ira hau manguli anu najadi ka ana-anaguru i Yesus. Sampesani nariumo i Yesus nosintomuka ira bo nanguli, "Tabe." Ira nanggaparai la bo nanggapui kadaNa mombasomba la.





Naupu haitu, i Yesus nompopakita karoNa ka sapulu
saitopa anaguruNa tempo ira nonturo nangande
nosanggani-nggani. NionteakaNa ira sabana nakura
pomparasayara bo nakaa bagara sampe ledo nadota
nomparasaya tesa nu roara anu nanggita la natuvu
mpanjili. Naupu i Yesus notesa ivesia ka ira, neoremo
la hau ri suruga bo nonturo ri sabingga nggana nu
Alatala.



Apa Alatala
mpuu-mpuu
nompotove manusia sampe nidekeiNa
AnaNa saito-itoNa, ala isema-sema
momparasaya AnaNa ledo rapopogaa
lako nte Alatala tapi manggava
katuvua mabelo sampe ri
kasae-saena.



Roma 3:23

Pura-pura manusia nadosa bo ledo masipato manggava bagia ri kaoge nu Alatala.

Roma 6:23

Isema-sema novia dosa manggava tambo, bo tambo haitu kamatea anu mompopogaa ia lako nte Alatala. Tapi pedekei bayangi lako nte Alatala ka kita, haitumo kita matuvu mabelo sampe ri kasae-saena. Kita nanggava pedekei bayangi sabana kita nosangu rara ante Tuputa i Yesus Kristus.

Ibrani 9:27

Alatala nompakatantu manusia mamate aga sanggani, bo maupu haitu ratangara.



Efesus 2:8,9

Lako ri pomparasayamiu i Kristus, komiu nipakasalama sabana kabelo rara nu Alatala. Haitu ledo asele pompasimbukumi mboto tapi pedekei nu Alatala bayangi. Kita nipakasalama ledo sabana pompasimbukuta mboto ala ledo maria tona mangoe manguli, “Yaku hii nipakasalama sabana pompasimbukuku mboto!”

Roma 10:9,10

Ane kita mompangaku ante sumbata, <<I Yesusmo Tupu,>> bo ane kita momparasaya riarantaita Alatala nompakatuvu mpanjili la lako ri kamateNa, kita rapakasalama. Apa kita nomparasaya i Yesus riarantaita sampe Alatala nombareke kita nanao ri panggitaNa. Bo kita nompangaku i Yesus ante sumbata sampe kita nipakasalama.



Yohanes 3:16,17

Apa Alatala mpuu-mpuu nompotove manusia sampe nidekeiNa AnaNa saito-itoNa, ala isema-sema momparasaya AnaNa ledo rapopogaa lako nte Alatala tapi manggava katuvua mabelo sampe ri kasae-saena. Apa patuju nu Alatala nombatudu AnaNa makava ri dunia hitu, ledo ala mombahuku manusia tapi ala ira rapakasalamaNa.

1 Yohanes 5:11-13

Iveimo posabi nu Alatala: nidekeiNa ka kita katuvu nabelo sampe ri kasae-saena, bo AnaNa, i Yesus puna nu katuvu nabelo. Jadi, isema-sema natuvu nosangu rara ante Ana nu Alatala, ia matuvu mabelo sampe ri kasae-saena. Tapi isema-sema ledo natuvu nosangu rara ante la ledo matuvu mabelo sampe ri kasae-saena. Yaku notulisi sura hitu ka komiu topomparasaya Ana nu Alatala, ala rasanimiu mpuu komiu matuvu mabelo sampe ri kasae-saena.



Matius 26-28; Lukas 22-24; Yohanes 13-21

Storyline by: Edward D. Hughes

Illustrated by: Janie Forest
and Alastair Paterson

Adapted by: Lyn Doerksen

Ledo Kaili NT (Iew) © 2020, Wycliffe Bible Translators, Inc.
All rights reserved.

<https://live.bible.is/bible/LEWLAI/MAT/1>

©2025 Bible for Children, Inc.

www.M1914.org

www.bibleforchildren.org

